

## Komentar izmjena Zakona o konkurenciji

Na web stranici VTK BiH, u okviru Vodiča kroz vanjskotrgovinsku regulativu, dat je kratki prikaz Zakona o konkurenciji u BiH, a povodom izmjena Zakona objavljenih u Službenom glasniku BiH broj 80/09 daju se kratke informacije vezane za te izmjene. Izmjene su usmjerene u pravcu propisivanja obaveze Konkurencijskom savjetu za objavom odluka i u dnevnoj štampi a ne samo u službenim glasilima (čl. 16), skraćenje roka za donošenje zaključka o pokretanju postupka (čl.18) kao i specificirani rokovi za donošenje konačnog rješenja po zaključku o pokretanju postupka (čl.41.).

Naime, do ovih izmjena zakona, Konkurencijski savjet, kao organ nadležan za zaštitu i promociju tržišne konkurencije u Bosni i Hercegovini, bio je u obavezi da odluke o pokrenutim postupcima ocjene koncentracije objavljuje u službenim glasilima, kako državnim tako i entitetskim. Međutim, u cilju upoznavanja šireg auditorija sa pravilima, mjerama i postupcima zaštite tržišne konkurencije kao i sa radom Konkurencijskog savjeta i njegove transparentnosti u provođenju Zakona o konkurenciji, najnovijim izmjenama zakona se nameće obaveza objavljivanja odluka i u dnevnoj štampi. Pri tome je propisano koji se podaci naročito moraju objaviti:

- a) Nazivi privrednih subjekata učesnika u koncentraciji;
- b) Oblik koncentracije i
- c) Privredni sektor u okviru kojeg se koncentracija vrši.

Druga izmjena se odnosi na skraćenje roka za donošenje zaključka o pokretanju postupka ocjene koncentracije. Naime, izmjenama člana 18. zakona propisano je da će se smatrati da je koncentracija dopuštena u slučaju da Konkurencijski savjet u roku od 30 dana, od dana izdavanja potvrde o prijemu kompletne i uredne prijave iz člana 30. ovog zakona ne donese zaključak o pokretanju postupka ocjene koncentracije.

A treća izmjena napravljena u članu članu 41. odnosi se na specificiranje rokova za donošenje konačnog rješenja po zaključku o pokretanju postupka. Nakon donošenja zaključka o pokretanju postupka, Konkurencijski savjet dužan je donijeti konačno rješenje u roku:

- a) od **šest mjeseci** za utvrđivanje zabranjenih sporazuma iz člana 4. ovog zakona (zabranjeni su sporazumi, ugovori, pojedine odredbe sporazuma ili ugovora, zajednička djelovanja, izričiti i prećutni dogovori privrednih subjekata, kao i odluke i drugi akti privrednih subjekata koji za cilj i posljedicu imaju sprečavanje, ograničavanje ili narušavanje tržišne konkurencije na relevantnom tržištu);
- b) od tri mjeseca za utvrđivanje pojedinačnog izuzeća iz člana 5. ovog zakona (Konkurencijski savjet, na zahtjev jedne ili više stranki u sporazumu, može donijeti rješenje o pojedinačnom izuzeću od zabrane sporazuma iz člana 4. stav (1) ovog zakona, ako sporazum ispunjava određene uslove) ;
- c) od četiri mjeseca za utvrđivanje zloupotrebe dominantnog položaja iz člana 11. ovog zakona;
- d) od tri mjeseca za utvrđivanje ocjene koncentracije iz člana 18. ovog zakona.

U službenim glasilima Bosne i Hercegovine i entiteta je objavljeno niz odluka a od sada će se i širi auditorij moći upoznati sa radom Konkurencijskog savjeta.

